

蘊素閣詩續集

蘊懷閣詩續集序

余觀近人別集頗以序爲重而交游之衆多者乃至五六人爲之惟桐城姚刑部惜抱軒集歟無一序夫以刑部之虛懷取善豈謂並世之人無足爲吾之序者而寧缺之邪抑自以文情幽隱未易喻之他人而姑有所待邪君子引而不發躍如也後之人讀吾之文而知之而好之而漠然置之則皆非吾所與知者而奚以序爲邪往者憚子居爲瑞金令瑞金有詩人謝枝崙者性好與人忤其詩爲一縣人所非笑獨嘗厲書質之子居子居先視其序序甚蕪穢遂擲去已復於亂書中得之辭意古澁讀至盡急造訪其廬而謝君已先一日死子居悔恨時時爲朋輩言之以自

訟然則序之佳惡宜亦君子之所慎擇者邪且序者序明  
此書之悵也文學如子夏親受業於孔子而序其本朝之  
詩其爲知之之審無惑矣然而關雎后妃之德治世之音  
猶不能無異說等而下之鄭衛之風謠信皆懷忠感遇思  
賢憤俗之所爲作邪抑或雞鳴艸露信爲蕩子佚女期會  
之時與地邪蓋至今未有定論也嗟乎三百篇聖人之所  
手定學者尊而目之曰經童而習之老死而無所適從又  
況儕輩之所爲猝焉而求之漫焉而應之不幸而值豪情  
盛氣如子居其人幾何不相遭于一擲也吾友婁東盛子  
履負詩名三十年凡其所作刻而行於世久矣近又梓其  
續集以詩索序於余且一再促之余思子履平生同門同

歲祿位聲譽昭然在人耳目者不可一二數而子履不之  
索何邪豈以余爲能發明子履之詩之旨邪余於童而習  
之之經且未能決然守一師之說而顧能論定子履之詩  
邪昔顧亭林深譏好爲人序余心善其言而不能從違心  
徇人之作不勝其多而於子履若有所靳子履或反聞而  
喜之以爲不言之言乃深於言者此則子履之重失而非  
余之咎焉已道光三年十一月望日陽湖陸繼輅

蘊懷閣詩續集卷第一

鎮洋 盛大士 子履

辛巳

人日李少白

續香

陸春堂

從星

招集堞影軒分韻

得花字

人日得高會豪情亦足誇春城開酒國勝事屬詩家  
樗散愧鄭老草堂懷浣花東南賓主美此樂最無涯

得同年陸祁生

繼輅

書答寄二十韻

時祁生爲合肥司訓

入春二十日酬應苦紛擾元規塵汗面頓覺清氣少忽披  
故人書如坐明月皦照膽扶幽闇列眉豁深窈憶昔丁丑  
歲執別秋風早燕臺蹶霜蹄白髮催人老余歸越二載已

卯歲之杪他鄉各異縣異縣音塵杳迢迢淝水雲青青釣  
臺草仰首故鄉樹盼斷荒江表半菽羈冷宦一飯不能飽  
假君閒歲月著書積千藁余亦志刪述興到頭欲掉雅興  
俗尙違企茲修名好冥鴻慎翔集雄鳩惡佻巧但惜會合  
稀思君意如擣朱簾稻香樓赭城斜陽道名都古浚適詩  
夢煙霞繞乞君惠瑤瓊相與訴懷抱君勿孤願言秘此篋  
中寶

送鐵嶺達茂才

麟

北歸赴京兆試

送客青雲羨鳥飛酒邊離思兩依依結交氣誼成傾蓋臨  
別殷勤惠解衣

君臨行以  
繭袍贈我

聚散總深知已感升沈莫使素

心違異時車笠欣相遇重話淮陰舊釣磯

宰相誰陳薦士書十年風雨嘯蓬廬卽看破壁飛將去始  
信生才定不虛遊子音塵千里外高堂心事九秋初贈言  
珍重頻回首預卜江干報鯉魚

輓彭甘亭

兆蓀

梗概異儕輩潔修見性情律身行止慎聞道死生輕天厄  
才人遇詩垂大雅聲定根成慧業水月證光明  
甘亭晚悟禪旨  
篋衍藏君集閒來手自鈔每斟花下酒如對素心交江上  
驚聞笛淮陰嘆繫匏素車馳未得落月黯林梢

次韻答鄭瘦山孝廉

璜

層軒面水引漁竿迴抱雲根十步寬一笑酒人來舊雨半  
簾花氣怯餘寒相逢老大爲詞客畧可栖遲是冷官不信

華年駒過隙，鐙前重把髭毛看。

達誠齋權使三招飲官署之後湖草亭卽事

湖亭五月晝生涼，蓮葉田田綠滿塘。小雨催花猶未放，輕風掠水已生香。嘯歌欲上樓干尺，豪興奚辭酒百觴。此會淮南久寥落，惟公槃敦領詞場。

黃小舟侍御玉衡輓詩

我昔未識君，先與香鐵交。香鐵數語我，詩格君最高。匪特詩格高，植行希賢豪。風義重師友，力挽薄俗澆。良人惟古，懽未見憂心。怗旣見我心喜，比似漆與膠。東華人海中，聲氣侈札僑。惟君所交遊，一言誓久要。春花三月暮，落紅滿晴郊。獨我將南行，潞河買小舸。別君不忍別，君魂黯然消。



勸作數日留歸計不可撓臨別惟痛飲醉中馬蹄遙別來  
彌一載音問久寂寥空函恥殷浩浮沈悵洪喬荊門雲疊  
疊長淮水迢迢忽傳誓墓文乞假馳輪輶順道沂淮水開  
徑披蓬蒿我喜出望外促坐談深宵况同香鐵來甕頭餘  
春醪呼僮剪菰韭他客不及邀近况畧一訊縱談古風騷  
示我近箸詩丹黃手親鈔云將付剞劂又患日月慆千秋  
身後名珍重如英瑤豈其死生理塵夢悟幻泡惟此著作  
事結習不棄拋三日泊淮上一颿候江潮揚州惠寄書游  
興誇同曹眼經大江洗首向青天搔秋風動羣木浩然辭  
江皋吳山與越水徧歷風塵勞川涂修以阻眠餐狎風濤  
古洞叫猿狖惡溪走鯨鰲南中氣候異秋暑林葉焦君體

故羸弱兩髯驚早凋一豎倏爲厲噩夢倉卒遭同行有香

鐵喪具一手操信州賢太守

黃霽青  
安齋

昔與君同僚惡難重

友生義聲薄雲霄香鐵往謁之殯殮用始饒奠君一杯酒  
爲君理歸橈昔君視香鐵氣誼如同胞香鐵滯京師孑然  
繫苦匏代籌將母計廉泉分一瓢一瓢感君誼遠勝金纏  
腰悠悠勢交者此惠奚能徼死友不負諾交情戀綈袍扶  
輿歸羊城嶺樹環岑巖巖嶺樹暗魂夢相爲撩想君亦  
無苦鄉心慰無慘迴頭望淮浦一去風蕭蕭故人黃昏坐  
掩淚孤鐙挑君詩墨尚濕酒作鰈人綃執卷不忍讀衷哀  
盼林梢有鳥向空下君魂倘可招

懷粵東黃香鐵孝廉

釗

去歲夏六月君過淮陰城君家侍御歸並舫聯詩盟逝將  
返舊廬何時謁 帝京南風重挂席云待春水生期逝竟  
不至我心殊忤忤人事不可料客子矧遠行時節倏徂謝  
佇立愁影形忽接遠道書書中淚縱橫侍御疾不起川涂  
滯郵程輿輓哭死友悲風咽泉聲奔濤走巨鯁急浪翻長  
鯨孤舟竟覆溺隻身逐漂萍呼抔得再甦嘔泄中毒腥日  
暮泣杜宇哀嘯猿猱驚迂道遠送喪丹旆栖神靈生芻徐  
孺子素車范巨卿亮彼古賢喆高義渺與衡自君之去矣  
百憂中腸縈攬衣起裴裒夜望河漢明思君在嶺表索居  
苦沈冥豈不慕長安資斧勞經營流光荏苒去及時圖令  
名引領盼君至離憐尊前傾雲山七千里哀樂同關情

久未得盧明經湧消息作詩寄懷卽次其攜家車

鎮用謝靈運登池上樓韻留別之作

鴻雁振羽翰能通千里音如何一水隔乃使尺素沈別君  
半年餘離緒不可任平川綠層漲遠山青一林良辰慙孤  
往浩然思登臨覲面路忽阻四望環嶮嶮戚戚入秋感暖  
曖餘夕陰君爲倦途馬我爲失侶禽各以曠放意發此浩  
蕩吟碧雲隨我夢白水盟君心勗茲金石交吾道貞古今  
蘋花次達樵使韻二截句

一色螺痕濯更鮮娉婷照影惜芳年露珠落處紅衣濕散  
作圓荷小葉錢

秋風水面細生香隔岸漁舟過石梁同住江干不相識小

姑何事怨無郎

秋感雜吟

斷橋衰柳古時隄  
鍛羽驚禽繞樹啼  
銜得寒雲輕重色  
最高枝上不堪棲

郭外人家屋數間  
長淮四面水灣環  
更無片石堪登眺  
獨對平蕪書裏山

歸鴻響斷蓼花洲  
驛樹萋迷動客愁  
如此秋聲如此客  
酒悲時候怕登樓

木葉亭皋下夕煙  
秋懷振觸髻絲邊  
空階寂歷吟聲細  
付與寒蛩話可憐

鐘聲蕭寺夜闌珊  
欹枕三更夢未安  
醒眼難忘身世事  
此

生祇覺睡鄉寬

得京師友人書卻寄

京華一別二千里舊日文盟半寂寥奇氣祇因垂白減名  
心久被軟紅消更無才地傾時輩已覺儒官負  
聖朝喋躓燕臺慚駿足故人何事苦相要

苦雨嘆

重九之後十數日日日霖雨愁滂沱農田杭稻生兩耳溝  
水泛溢成洪河陰風颼颼吼林木卷起驚波撼茅屋離居  
蕩析鳥獸散村落時聞夜深哭流冗老幼互提挈道路倉  
皇走相失飢寒性命難苟全狼狽那能顧家室出門躑躅  
將何爲頭生蟣蝨髮不櫛歸來病苦更支離仰視皇天淚

沾臆未識催租人到門縣官租稅從何出况復危隄一線  
浮黃河欲合長淮流丁夫勞苦負畚揭清口歲歲嚴防秋  
哀禽啁啾出林表天意是催寒信早層層遠樹沒高下黯  
黯沈雲眯昏曉東籬菊色寒更鮮恨不散作黃金錢荒苔  
泥沒少人跡如麻雨脚紛纏聯無慘坐雨且獨酌眼花昏  
黑成孤眠牀頭屋漏苦偏仄中夜披衣三嘆息

鬻孫謠

淮濱老翁髮垂耳凍瘰黧黑飢欲死傭畊兒子慣作苦忽  
遭時疫竟不起兩孫大者八九歲幼者尙在襁褓裏可憐  
逋債逐歲增終日叩門聞厲聲幼孫乳哺不忍棄攜其大  
者來入城兒婦牽衣攔路哭翁亦垂垂淚盈目論價無心

較重輕但求少貸鞭笞酷臨行回首重提攜餉以餅飴聊  
充飢分衢南北望不極彼此一去無消息荒郊日夕下午  
羊淮流嗚咽人斷腸仰視飛禽舉雙翼安得引孫置翁旁  
歸來鄰舍訴悽惻掩淚相看問價直却因同病更相憐燈  
火黃昏少顏色東家鬻女錢數千西家鬻男錢數百煢煢  
骨肉不相保生男不如生女好鬻女可支一月糧鬻男只  
供幾日飽如翁衰病面枯槁卒歲何能免飢殍搖手噤口  
毋多談門外追呼又奔擾

時癘行

辛巳之歲五六月夏行秋令天陰寒疾風淒厲砭肌骨彫  
質木葉青闌殘驟聞疾青徧發作倏見比戶罹災患四肢



麻木嘔且洩如有毒物潛胸肝倉猝旦暮人鬼異盧扁束手無由援朱樓綺閣酒滿尊奉觴上壽笙歌喧三爵未酬夜方半巫咸翦紙招其魂更有流亡道路人眼見溝壑填紛紛山邱華屋只一瞬何論生前富與貧吁嗟鬼伯太肆虐梟獍什伯相爲羣敦厥血拇恣攫網十室九室無完全初疑偏災在淮北遑知河洛譁相傳或云疫氣所周歷始自越角來吳根自南而北數千里勢若瓜蔓滋糾纏近聞京師九門外家家延醫虔禱神  聖心軫念民疾苦痼瘵在抱深憂勤太醫奉  詔選良藥陰陽酌劑和甘辛日華炳曜雲五色盡掃氛祲回陽春我讀洪範五行傳感召休咎非無因勤求民瘼答  主眷惟願詢此芻蕘言

## 運租行

國家財用之所出江南租賦甲四方膏腴千里慶豐稔兆  
姓踴躍爭輸將偶逢旱乾與水溢

詔賜農租切軫恤

皇帝清問民疾苦不使窮黎向隅泣比年生齒日殷繁民  
間稼穡殊艱難中人之產百餘畊八口衣食力已屨官倉  
納糧溢正額吏胥侵蝕於其間有司藉口運船費坐使民  
力爲之殫飛芻挽粟達天府丁男饋運亦勞苦關河轉  
漕費日增竭歷支撐究何補度支出入歸均平審度時勢  
須權衡大吏上書爲國計每斗議加什之二諫官伏闕觀  
至尊利弊剴切干言陳

帝曰咨女大小臣敬體朕意

愛朕民朝廷正供有常數朕不加賦不患貧躬行節儉訓

臣庶道在正本清其源大哉王言炳綸綍德意導揚資輔  
弼力行實政存實心國帑儲藏自充實況奉 恩旨蠲

歲征八荒六合臚歡聲餘糧棲畝百室盈共修稼器勤春  
畊 聖人在上民樂利運租不用催租吏

築隄謠

有吏清江來昏夜走捉人借問清江吏徵發何紛紛云值  
秋汎急萬馬驚濤奔官符促隄工限以十日完黃河洶洶  
水聲惡拔浪天風走蛟鰐危塘一線東河流百萬帑金此  
銷鑠去年蘭儀大被災南河千里哀鴻哀今年洪澤勢泛  
溢保障淮揚十分急可憐丁夫忙築隄兩脚泥沒身無衣  
得錢不足供一飽歸視妻子環而啼吏胥上下手府庫皆

虛糜大官卽聽察何能一一親糾治朝賜餽夕賚幣薦賢  
勞舉卓異 天子臨軒問政事勉竭涓埃報 君賜安  
得國家帑藏不許囊橐私分肥公旬力作課實效金隄鞏  
固垂根基

### 淮關吏

道逢淮關吏衣破屨露趾拉雜訴飢寒逋債苦積累借問  
淮關吏窮困胡爲至於此吏言河朔歲游饑往來豆麥商  
船稀糧艘攜貨亦寥落上下用度難支持歲終權酤計緡  
算正稅雜稅分等差盈餘之銀十數萬昔之所入今全虧  
長官清廉無宦資籌畫國計深憂思十償其五尙不給  
詔許分備寬其期博徵白着諸弊竇務使釐剔無留遺不

聞潤官議加耗吾儕囊橐何由肥

皇仁如天覆萬物

嗟爾胥吏愚無知汝輩平時饜梁肉衣食半竭民膏脂嗚呼民生爲汝窮膏脂汝之窮困將奚辭淮南一望平蕪綠何不村中守耕牧

鹽筴行

淮壖瀕海集萬竈鹽筴之利雄諸邦漉沙熬波出素雪懋遷財賦通三江商人給取官府帖官與商人熟酬接江淮習俗尙繁華歲耗黃金百千篋帆檣百丈樓船高海門出沒藏奸梟官兵怯弱禁不得對面公然爲盜賊十年積弊相因循商人自此日益貧華筴高排月出艤依舊笙歌夜達曉可憐避債竟無臺公私券負何時了或云淮北貧不

如淮南好庸知轉運日艱難張皇補苴亦草草大吏章表  
上九重整理鹽課谷羣工罷斥饋獻禁糜費毋令枵  
袖東方空嚴巡海疆籍戶口梟販不得潛其蹤牢盆官器  
定程獲會見蓄貯旋盈充願得離臣盡如李沆與劉晏鹽  
法施行朝野便

夜坐有懷達茂才

麟

並寄秦上舍

漢章

四月君北歸欷歔執君手接君五月書已屆七月後節序  
訝錯迂風雨蔽昏黝江南卑濕地時癘蔓延久近聞畿輔  
內疫癘家家有秦生寄書來述君患在肘卧牀十餘日蹙  
額而疾首醫言匝月餘方可出戶牖所幸恩榜開奉  
詔改重九君自奮功名不知疾愈否天或假之緣遇合事

非偶又恐體氣瘠憊苦那能受思君日輾轉中夜望星斗  
秋航挂遠帆一詩達我友秦生近如何論文憶尊酒欲知  
別思深請視隄邊柳

述懷

聖賢尚庸行履蹈循康莊行乎性所適事事安其常或遭  
人倫變始以奇節彰惟其志行純日月爭輝光讀史慕忠  
孝竹帛書煌煌頑懦亦振立聞風生激昂生成感君父一  
飯無能忘吾今已衰矣此願何時償

讀書競浮譽其志先不堅著書爲求名其書必不傳吾今  
悔前非歲月已代遷來者尚可追所貴用志專皓首以爲  
期兀兀守窮年

古人爲文章醞釀必深厚道德含光輝經濟抒抱負俗儒  
騁才華談藝侈辨口無論文不傳傳亦不能久殫心事迹  
作近代實罕有浩歌發蒼涼懷我千載友

白壁耀日月黃金積山邱祇供生前樂莫償百年憂百年  
一轉瞬百物無一留玉魚殉葬具乃在市肆頭愚人尙不  
悟日夕錐刀求吾生慣食貧恥作田舍謀所愧七尺軀與  
俗同沈浮不顧今人嗤恐遭古人尤

汪厚夫太守

彥博

自青州歸晤於淮上卽事次韻

子美成都舊草堂園花識面意難忘未能免俗憐羈宦終  
欲隨君引釣艍此去江天驚歲晚中年朋舊繫情長鉏雲  
有約休相負多種閒閒十畝桑



學舍新築澹然居卽事

廢地一畝餘來往人跡少淤泥頽春蕪斷瓦沒秋草相傳  
廿年前老屋尙完好風雨失修葺牆墉那能保人嗤築室  
謀我類營巢烏布置四十日墾築徹昏曉一朝見此屋我  
願藉粗了遠勢枕樓閣竹木入青杳忽生煙霞想不受塵  
氛擾平林渺無極莫嫌我廬小

乘屋事不易經始尤艱難運甓伐薪木奔走不得閒匠人

貪情嬉督率多煩言過嚴輒怨詈少縱旋偷安况我有懶

癖何處勤墉垣許君澹岩人

郡文學許君依仁

巧慧侔僊班爲我

召役作助我施雕鏤巨細必規畫不惜心神殫落成爰笑  
語相對開心顏容膝十數步頓覺大地寬酌酒勸許君深

杯且同乾心事媿杜陵廣厦千萬間

夙志慕恬尚恥被榮利園新居名澹然安我陋室陋陳丈

書匾額

陳學博師濂

字畫勁而秀跋語過獎飾名實愧難副作

記屬阮公

阮明經鍾瑗

峭逸似子厚同人惠新什玉華冷泉嗽

琅琅屏障間如聽金石奏自畫平遠山山意削癯瘦試尋

澹中味娛此永清晝

學舍雖近市清曠無塵緇門外車馬客姓名不相知惟茲  
素心人杖藜時追隨或攜一甌酒各出數首詩坐卧隨所  
適動靜無不宜黃虞幾千載浩歌發遐思高林出寒月流  
光照書幃偃仰愜此夕不醉將何爲

澹然居夜坐

談詩客散日之夕黃葉紛飛門外積虛堂瀉月寒無聲流  
照平林引空碧此時四壁融冷光起視珠斗生高芒濕衣  
不覺露華重迴廊吹墮松花香欲眠不眠隱書几策策風  
聲撼牕紙忽催鄉思入扁舟坐釣滄江一竿水閒身喜無  
塵事羈寂坐頓覺心神怡此中遐想出霄漢仰天大笑傾  
千卮

驟寒

連朝苦雨悶層陰一夕西風響遠林短髯乍驚時序晚孤  
鐙漸覺病愁侵尊無佳釀吟懷淺篋有綈袍友誼深看到  
松枝蒼翠色此時方識後彫心

一枝巢中有竹數竿寒翠可愛詩以賞之

一徑入紆曲蕭寒欲暮天暗中先透月空處忽生煙滴潤  
雲衣薄盤根石齒穿芳華嘆搖落羨爾發清妍

得陸萊臧孝廉

我嵩

書答寄二律時萊臧客江陰

之雲蘿山館

中歲不得志三年此索居荒城寒雨夜遠道故人書強飯  
我猶健高歌意自如君才正清發未合戀樵漁

雲蘿陞社侶豪興還滄溟江水望不極君山寒更青關情  
憐舊雨仰首數晨星花事春歸早溪頭盼客舫

聞將北上

淮上得家書

昨得鄉關信猶聞疫癘多全家喜無恙生計近如何滿野  
有鴻雁中田少麥禾焚香籲賢宰畧爲緩催科

十月初七日紀事

十月初七夜四更騶卒酣臥柝不鳴城西迤北數萬戶巷  
無車馬重門扃中有賈人屋數楹積儲白鏹千箱盈忽然  
牆角聞厲聲似夢非夢心魂驚披衣下牀脚不韞大炬突  
出刀光明十數餘人蜂擁入喝令急獻囊中金此時性命  
鴻毛輕欲與賊鬪力不勝劃傷左股與兩臂閉屋屏息不  
敢爭賊乃肱篋恣所欲頃刻金穴爲之傾前呼後應捆載  
去聲音似熟面目生賈人避賊賊出城街人馳掠呼營兵  
誰家樓閣調竽笙似聞博塞爭輸贏邏巡守望了不問更  
有何事來干卿明晨官符出捕賊城頭徹夜喧鳴鉦獲賊  
上賞縱者罰賊從何處逃其刑所慮掩耳爲盜鈴姦究草

竊將頻興

霜天吟

天高月明繁星熒熒葉落如雨不聞風聲紆鬱川路蒼莽  
沙磧思婦腸斷征人頭白

寄懷王給諫

家相

報國文章著清秋鶴在陰諫書民命活優詔主恩深辛  
苦陳農事鞠謀體聖心自今江渚上鴻雁少哀音

獨酌

獨酌不成醉愁多如亂絲箸書來日短聞道此生遲博士  
名滋愧閒官拙最宜隨班頻讀詔孤負聖明時

平野

平野蒼然色朦朧遠樹遮雲寒愁釀雪風急怒吹沙瘠馬  
傷行役勞人感鬢華年荒邨市小薄酒不能賒

出城訪友人不遇

城隅寒色障煙蘿北燕南鴻跡易訛塵事每逢閒暇少詩  
情總覺別離多滿林落葉蕭蕭下一路吟鞭草草過甚欲  
停車尋杜牧遠天無那夕陽何

孤雁次程禹山孝廉

虞卿韻

嘹唳聲隨斷續風寒雲猶帶色蒼雄隨陽舊侶應相憶回  
首關山似夢中

原作

天長  
程虞卿

迢迢關塞感秋風不共羣飛作陣雄自爾甘心宿雲

水網羅多在稻梁中

答寄潘彥輔明經

德興

十年溷塵海一刺不苟謁結交慕曩賢古膽照明月羣居  
多面朋嗤我口銜闕忽聞海上琴天風掃林樾

箸述徧海內傳者能有幾何況過情譽一瞬涸溝水惟君  
勵潔修我意慙覲止古調君獨彈何處諧俗耳

夢游玉真峯瓊英落無數招手君引我一笑忽相遇迢迢  
碧雲天梅花三百樹何當泛香海隨君艤舟渡

壬午

爲程與九參軍

得齡

畫聚花樓圖題句以贈

水晶簾開清晝長棗花樓上春風香碧雲如煙吹不起滄



作明霞半天紫樓中之人渺若仙高歌醉抱煙雲眠雲思  
煙想入青沓能以畫意通詩禪贈我新詩發清警索我繪  
出樓中景前身我亦夢餐霞特爲仙人寫花影羨君幽棲  
築此樓枚生宅畔澄寒湫今古幾人共懷抱明月自映清  
淮流何時棗花樓上頭拍肩引我圖中遊煩君爲我評畫  
藁更出秀句相賡酬詩成夜坐春寒重一院落花入香夢  
鑾江墓田圖歌爲程與九作

君家枚生里南望先人墓清淮咽寒月鑾江隔煙樹煙中  
遠樹青無數甘草山頭夕陽暮拂蘇看飛隴上雲牽蘿省  
識門前路山村花發紅欲然年年寒食春可憐東阡南陌  
杳莫辨但見紙錢歷亂隨風旋不聞棲鳥反哺啼啞啞但

聞鑾江孝水鎮日流涓涓嗚呼淮陰冷宦江南客還君此  
圖腸斷絕

夢游仙詞

琳書自寫洛神篇螺翠輕浮九子煙欲喚靈芸裁石葉紅  
珠合倩藕絲穿

承露盤中露乍凝銅荷高蕤九華鐙彈璈解和元靈曲慚  
愧人呼王子登

翩翩妙想擁飛鸞曾受仙家駐景丸何處靈香吹郁烈碧  
城樓閣聳高寒

華堂點點燦星芒玉洞清虛鑲鳳皇獨立紅牆雲一角梨  
花如雪月如霜

紺雪山房白玉池繞廊明月濯漣漪瓊林一夜春歸早消  
受東風弟幾枝

畫梁海燕自呼羣不散檐頭一縷雲斜卷珠簾數蝙蝠玉  
鉤微動水晶紋

百樹梨桃帶紫暉平田流水綠沄沄一犁細草痕如織好  
護瓊芽倩鶴耘

紫錦爲囊白玉鈐青籐紙上字排籤豔詞多仿齊梁體或  
恐評衡例太嚴

寶帳流蘇曳綵毬斑龍九色駕文虬宜春苑裏雲如幕別  
有仙人十二樓

深宵被酒去匆匆魚鑰聲傳禁苑中贏得人呼牛馬走卿

卿原是可憐蟲

風亭水檻自清寥路轉溪西又幾橋  
曾傍芙蓉花下宿衣香十日未全消

路出藍橋弟幾家舊遊約畧記無差  
春星影裏桐花落滿地濃陰護碧紗

涼雨連朝霧不收仙家吟緒亦多愁  
羨門別構棲真館紅鯉休教踏浪遊

紫姑私印製玲瓏小篆銀鈎點畫工  
碑體偶然臨碧落向人濃笑慣書空

清琳響戛聞風臺銀蒜垂垂戶半開  
煙駕似分嵐翠影玉真侍史宴花來

香屑分來脈望餘雙縣藜燭照華裾雲籤七笈人間有不  
是龍威未見書

隔溪人語出煙蘿渡口漁郎打槳過三月江南春似海送  
君行處落花多

縹緲天台萬仞霞暫醒仙夢卽思家碧桃開後剛逢雨紅  
豆春來漸有花

流鶯百轉過花南簾幕輕寒午睡酣別有珠巢渾似繭教  
儂辛苦學春蠶

雲英飭宴上元宮廿四番花一色紅此事非關殷七七封  
姨遊戲小神通

珍珠簾卷月華明隱隱繁絃急管聲寂歷秋宵撫瑤瑟人

間別有董雙成

疑雨疑煙總斷魂  
重門黯黯欲黃昏  
藏鉤賭酒心情畧  
有春衫未浣痕

羽葆珠幢捧玉童  
眉嬾金蓋繡玲瓏  
一從南海迴鸞馭  
夢醒蓮花紫禁中

連朝青鳥話殷勤  
未了人間一點塵  
種就梅花三百樹  
也隨紅雨惱殘春

綠雲斜上水西亭  
仙侶蘿笻幾度經  
蟻路暗通花葉底  
一絲引出薜痕青

冥濛煙樹隱朝陽  
霧縠微聞百草香  
拾得丹砂醫病鶴  
半嵐清露濕衣裳

鑲雪爲肌冰作膚未須指爪倩麻姑龍梭織就珍珠字便  
算真靈位業圖

錦字濃添麝墨薰碎珠零壁盡淵雲樓頭一紙隨風舞沈  
宋才名從此分

方塘嫩澗小瀛州環繞瓊田翠浪浮荷葉田田微過雨水  
邊涼夢易生秋

絮雲一縷翠千重削就青螺髻子峯天半忽吹風謾謾更  
無人共倚長松

蘊懷閣詩續集卷第一



蘊懷閣詩續集卷第二

鎮洋 盛大士 子履

壬午

三月十五日邱勤子

廣業

黃少霞

以炳

兩孝廉招

同朱礪南茂才

紆

盧蓉湖

湧

潘彥輔

德興

兩明經

補襖於荻莊之繪聲閣夜陪礪南乘小舟而歸途

中得詩二首

契事過十日尙餘半月春賓朋一尊酒俯仰百年身老樹  
園亭古石泉風味新別饒閒曠意魚鳥亦親人

繞屋雲嵐氣幽棲愛地偏草根青過雨柳眼綠迷煙流水  
足觴詠禽聲亦管絃晚隨南郭叟歸泛釣魚船

瑣兒舊疾復作與九以詩慰問次韻奉答

骨月常關良友心傳來新句細沈吟  
洗愁不用酒千斛醒眼忽看春滿林  
憂患中年催我老交游真味耐人尋  
棗花樓是神仙宅日日郵筒惠好音

閏三月晦日與九招集諸同人於柳衣園看芍藥  
卽事二十四韻

雜英媚餘春上已恰逢閏我如厄黃楊頗爲病所困誰可  
與歡譚積痼亂方寸偶理兩髻絲輒作數日悶仰視碧天  
際黃鵠舉千仞鶉鷃無羽翰雲間渺難近惠風噓槁木良  
朋動芳訊尋君文酒盟勗我眠食愼二旬得休暇體氣漸  
和順相見各計日自幸緣非悒餞春諾無忘睹詩興仍奮

名園豔繁枿萬重紅霞暈枝隨風態轉色借露華嫩翻其  
來何遲戚若抱幽恨幾回勸春留一笑招客進此日足千  
古我欲向花間行樂須及早百歲若一瞬曲江有高樓陳  
跡畧可認壇坫冠江淮臨風緬餘韻園中有曲江樓國初諸名流會合之所  
不知來者誰但苦去日迅有酒共斟酌有愁且排擯樂此  
賓主美軒昂助談論飛禽倦知還花氣夕逾潤一詩叙游  
蹤鴻泥此間印

次韻答陸祁生

望遠重披別後牋酒闌猶戀舊時筵最高樓閣春如海昨  
夜星河澹似煙燕市繁華還入畫江關倦羽不驚弦新詩  
千里勞相問剪燭宣南話昔年

得盛子履書前題宣南話舊圖詩作此報謝

陽湖  
陸繼輅

斑斑清淚漬瑤牋記得徵詩是別筵夢裏樓臺全潑  
墨畫中草樹半生煙游仙劫短星沈海禮佛人歸月  
上玳芡藥櫻桃零落盡未須我輩惜凋年

陸萊臧捷禮部試卽送其之官閩中

我與君定交道誼十年共君今將遠宦可無一言送讀書  
莅民社儒術上所重今科春榜發賢俊天府貢羽儀漸  
達鴻聲諧集梧鳳進士百餘人皆以縣令用欲奏循吏績  
遠適漢唐宋却笑章句儒競喜文墨弄侈談翰苑榮願作  
釣天夢豈知百里侯一邑權所統常存愛民心方協輿人

誦聞地瀕大海間閭繫獄訟善良胥保惠姦宄毋稍縱庠  
彥肄禮樂村氓勤播種倘逢歲不登勿使餒與凍庶幾報  
最書可入承平頌寶玉此邦多君自足清俸歲儲或有贏  
買書日吟諷行矣君勉之柔轡爲君控佇見膺寵擢觀者  
道旁衆

有客有客行

有客有客頭半白自云昨自京師歸京師夏雨數十日九  
衢塵土成滲池永定河隄水驟漲隄口一潰不可支大吏  
倉皇事堵築補苴罅漏悔則遲畿內州縣百四十八十州  
縣遭災危

天子下詔求貧困不使窮黎苦飢饉計口授食發帑金披

章乙夜勤清問御史奏請通河渠欲以河工代蠲賑

帝曰嗟爾民何辜枵腹力役憊且痛若以賑濟作工費老  
羸溝壑誰其蘇况復天時近寒沍朔風獵獵砭肌膚已患  
流冗滿道路忍令肢體重霑塗所奏窒礙不可用

聖心專以民命重

聖心所向天心格瑞雪豐年兆三白出門沽酒典征裘且  
共圍爐醉呼客

劉太史 嗣綰  
輓歌

我昔聞君名譽早及識君顏君已老都門談薤不三載其  
間會合又甚少法源僧寺繁花開曾攜濁酒邀君來鴻雪  
齋中集吟客

黃小舟  
侍御齋

我亦陪君浮大白我如鶉鷄囚樊籠

杖藜不得常追從衡宇相望祇一里彼此牋素馳奚童春  
風席帽隨人走自顧形骸絕衰醜君也徧閱同人文獨誇  
我文不容口花事終虛綺陌遊春波已綠池塘柳一歸去  
卧淮之陰墜歡何處重追尋君之衰病亦日甚退飛六鷁  
投寒林荒江月黑楓林紫悲風蕭蕭四山起故人慘戚非  
朱顏我獨無慘後君死嗚呼惟君得享著述名雖死之後  
君猶生今我眼暗髮垂素鑽研故紙茫無成此身合向青  
雲置君已不負平生志胡爲病苦久支離憂患中年獨顛  
頓風義平生友與師吞聲死別淚如絲宣南往日論文地  
碧草如煙繫我思

題趙明經

咸禔

水竹居圖

飛泉入叢篁雲氣四山綠神仙此棲游靈閣遠塵俗咄哉造物慳吾儕少清福遂使猿鶴侶嘲我髯毛禿先生性高曠雲中一黃鵠撐腸千卷書打頭數椽屋乞竹徑自鉏澗水月可掬相與娛良晨時復豁遠目伊人水中央或者居無竹美人倚竹居亦或在空谷二者偏能兼對之愜所欲願偕圖中叟寤歌此間宿

雲山仙籟圖爲惜菴居士王相畫并賦

空山絕無人語響但聞萬壑松濤聲中有白雲自來去與山相送還相迎忽然雲垂四山合幻作十二之層城此豈有意催我畫天半頃刻樓臺成眼前卽恐好景失筆下力與羣山爭岡巒布置亦潦州水墨意態殊縱橫雖非盡省



山面目頗謂能寫雲性情山容陰晴變朝暮以雲濃澹分  
重輕仰觀千峯挂虛碧俯視一氣回蒼冥御風思隨野鶴  
去清嘯或恐山猿驚道逢山人王子晉爲我夜半吹瑤笙  
明河耿耿不可渡雲氣自向衣裳生神光遠近彈指現有  
似五岳圖真形何當大嚼墨一斗生綃十丈搖光晶

題吳江郭頻伽磨靈芬館弟八圖

平林暎帶屋數間畫中意致清而閒天寒無人倚修竹庭  
戶寂歷門常關老梅一株幹如鐵片片飛花豔於雪寥天  
月落望參橫何處歌聲訴清切自來佳士妙寫真能以虛  
際傳精神亦如詩中有真我離貌取神無不可覽者毋乃  
心忡忡白眉未識神仙容頻伽一眉瑩然人呼之爲郭白眉庸知此圖有

深意匪以翰墨爲游戲一代爭傳著作才半生未遂田園

計下牀動足便天涯

頻伽移居詩句

別後寒梅着花未少陵野老

諸侯客秋風茅屋吹蕭瑟年年旅食饗西雲身世飄蓬鬢  
毛白先生何時歸去來溪流迴綠柴門開鄰翁對飲日之  
暮日日聞鷗此中住補屋牽蘿事苦辛知君亦是倦遊人  
他年竹樹橫斜外添得林宗一角巾

得黃太守

安濤書

京國三年別江關一紙書我方營薄宦君復痛居廬太有  
搏沙感况當落木初秋聲滿天地愁思不能舒

送惲徵君

秉怡

歸陽湖

暫時分手卽消魂風起平沙暮色昏話別慚無新釀酌衡

寒幸有敝裘存依人心事憐彈鋏何日溪山穩閉門春水  
毘陵催客棹遲君重把舊詩論

頻伽以靈芬館詩文集見贈賦謝兼以奉懷

衆山空一覽談笑傲王侯名以文章著人真狂簡流披煙  
問巢父挹袖識浮邱月色清淮好神仙何處舟

題畫寄徐明經

雲路

嵐容回杳靄潭影入空明忽見木葉脫似聞風雨聲此時  
良夜永隨筆小詩成不盡懷人意深杯且自傾

冬日過城南楊處士家看菊

六枳笆籬地數弓淺深花色笑迎風此間便是淵明宅只  
少南山入望中

清渠溶漾竹間扉  
石蘚痕青不滿衣  
見說今年冬令暖  
粉黃蝴蝶故飛飛

牆陰黯黯月來遲  
小立闌干見幾枝  
天意釀寒花釀雪  
半殘猶似乍開時

凍醪新熟甕聞香  
薄醉城南處士莊  
自起掀簾照花影  
不知門外有新霜

朋輩清游興足誇  
未須搖落悵年華  
相逢且莫匆匆別  
如此蕭晨如此花

小閣何嫌夜坐寒  
屏風一角影珊珊  
再遲一月留香住  
合共巡簷索笑看

三家兩家對門住  
十步五步扶筇來  
羨渠清福真修到  
一

日花間坐幾回

碧紗牕畔篆煙消翠袖金鈿態轉嬌我欲乞君攜數本待  
春風到畱根苗

淮陰竹枝詞

垂楊夾岸翠浮螺聽水聽風勞者歌試向荻莊深處望帆  
檣爭似亂山多

荻莊在淮郡北關外地  
近河嘴往來舟船如織

女牆缺處堠煙生新舊城樓繞夾城樓下水門舟一葉畧  
窺人影未分明

淮安舊城之北別築新城其中  
間謂之夾城有水門可通小舟

冶游裙屐映繽紛宛轉紅橋綠水痕同看珠湖好明月木  
蘭舟過柳衣園

柳衣園係程氏別業與荻莊  
相對紅橋綠水如入畫圖

郭家池館藕花風香在空濛水氣中並舫似憐花解語霎

時魚戲各西東

舊城西北隅卽古郭家池四面築堤禁捕魚者每荷花開時映日烘霞自饒勝致

十里郵亭兩岸舟春風送客宴花樓夜潮好趁風帆利似

識明朝阻石尤

淮人呼利曰累舟行風利輒云風累客多忌之

新蒲入饌酒頻攜歌管深宵醉似泥一種離情消不得勸

郎且莫啖秋梨

淮人酒筵多用蒲菜味頗鮮美供具蔬果惟秋梨不多見或云梨與離字同音也

市頭鐙火雜喧阗守歲家家戶盡開好過春朝新日子有

人除夜送書來

每歲頒發時憲書淮人轉相傳送謂之送日子過年猶言度日容易也或無人送而

自買謂之買日子過年猶言度日艱難也

咬春盛集新年客熟食還儲隔歲餐接飯待過三日後廚

孃手治五辛盤

淮人除夕蒸飯供於神位前新正三日以飯昇於厨下謂之接飯其木接飯以前皆

食除夕餘肴

無力游絲掩幔鉤春來思婦怕登樓千金亭畔青青草併

入眉痕一線愁

亭在淮陰故縣西韓侯微時釣魚於此既貴報漂母以千金後人築亭其上

楚王廟前車馬多韓侯祠畔人肩摩西街別有吟秋客獨

向蒲葭巷口過

楚王廟在府治南韓侯祠在漕院東皆舊城通衢塵市極盛蒲葭巷在西長街之南

幽樓地僻  
囂塵絕少

雙株火樹吐銀花新嫁娘來衆客誇要乞榛桃與蘭麝繡

簾風動笑聲譁

淮俗娶婦採輿鼓吹有文木雙株列炬目之爲庭燎新婦入門衆客盛誇其美爭索

果品香料  
以爲歡劇

水邊樓閣影周遮六曲闌干整又斜家在鉢池山上住秋

來多種鳳仙花

郡城西北二十里有鉢池山山旁有星相傳王子喬鍊丹於此丹成試與雞食化鳳

而去

蘆花飄蕭夕照微北來鴻雁音書稀聞道運船遲進聞授

衣時節望郎歸

淮人自北歸有附糧艘者每歲八九九月間糧艘齊進天妃閣則行人至矣

泛宅浮家狎水鷗每論生計不勝愁要移軍餉關前住秋

圃黃花插滿頭

軍餉關在南門外有楊處士家菊花極盛

四面鵲鵲菱茨香天妃宮在水中央舊時亭榭都零落衰

柳千絲送夕陽

舊城西南隅爲郡守諸公遊燕之地古有紫極宮改爲天妃宮在水中央昔年菱荷

楊柳所存無幾而遊蹤亦絕少矣

東廂西廂促織鳴九月十月寒風生小姑閒倚中庭月不

識天邊織女星

淮人不習紡織婦女多閒處者農桑敦勸是在良有司矣

黃河東下走驚濤砥柱中流亦大難官府文書循故事年

年秋汎報安瀾

往時河水屢盜官吏奉行故事每逢秋汎卽報安瀾而民間水患未嘗盡息比年以



來南河底定  
人始慶作云

飛鷺尋巢識主人一枝棲託亦艱辛林間有鳥自來去好

過一年淮上春

漕帥駐節淮安凡衛所官弁備屋而居度用日費每春夏之交有鳥鳴曰淮上好過

官弁聞之或相謂曰淮上殊不好過也

迢迢驛樹白雲隈風色津亭暮鼓催忽聽檣鳥聲不斷前

頭可是豆船來

淮關樵稅多取給於豆船其餘貨物皆次之

涼月如弓挂短檐村村晚稻刈腰鎌一畦寒菜霜初肅喚

買街頭老少鹽

淮人以運鹽爲業老弱不能負擔者各攜筐筥以賣謂之老少鹽

夜坐不寐偶檢舊藁率成一律

只有清瑣耐夜寒更無佳客話鐙殘十年誰喻作詩苦一

夢亦如行路難天宇澄空羣嶺寂吾人身世此時寬鄰雞

且莫頻催曉舊藁重刪字未安

野外卽目

接天沙岸迴喚渡客尋船微雨將成雪重雲不散煙幾家  
忙穫稻積水尙盈田近市饒生計魚蝦不論錢

和杜歲晏行

黃河隄邊起朔風千樹萬樹荒寒中驚濤乍定兩岸濶仰  
見缺月縣如弓築隄晝夜苦丁壯所幸力役無妨農杭稻  
登場歲其有十室九室年年空若逢皇天降饑饉更見四  
野飛哀鴻吾曹冗食耗財力愧無尺寸之微庸那堪游戲  
博酒食坐此糜費金銀銅文章功業百不就生成天地恩  
虛蒙一年三百六十日填膺感喟何時終

癸未

送丁孝廉

晏

赴禮部試

送君不惜酒杯傾，努力春華在此行。  
名以顯親宜早致，才惟用世不虛生。  
新詩大有飛騰氣，舊雨偏多悵惘情。  
莫爲東方勞索米，頓教歸夢戀莼羹。

春日試筆次熊大

德慶韻

小倚闌干自詠詩，峭寒天氣酒醒時。  
檐頭雲影濃於墨，不放東風過柳絲。

漫天煙樹總萋迷，把酒登樓日又西。  
只恐妒花風雨至，宵來愁聽鷓鴣啼。

頻仰自袁浦歸舟過，余學舍別後以詩見懷疊韻

三首答寄

望斷袁江江上波，會難別易悵如何。乍聽仙語吹冰雪，已

引詩心入薜蘿。歸去君憐同調少，

座中語及黃丈退菴彭君甘亭相繼但逝欲飲

不年來我悔箸書多。此行劇有滄洲趣，煙雨南屏潑翠螺。  
聞君將有西湖之遊

倉卒軒然起大波，憐君可奈客居何。焚如盡失囊中錦，

去冬

君客袁江寓齋不戒於火凡書畫圖章及三年所著詩皆燼

痛定還牽屋上蘿。身世艱

難雙髻短，吾人憂患此生多。迂癡共抱煙霞癖，且倚青山

染黛螺。

君臨行乞余畫靈芬館弟九圖

紛飛紅雨動簾波，酒半歌停喚奈何。小別春風折楊柳，相思明月上藤蘿。經旬夢想容光好，中歲交情感慨多。綠水

如油重放槩擬浮鷗鷁醉干螺

淮上訪子履於學舍別後卻寄

吳江郭麐

舒舒春水渺層波各在天涯可奈何  
天馬近皆餐苜蓿山靈聞已怨煙蘿  
新遭憂患心情減老覺朋儕里社多  
傾蓋太遲分手易莫辭妙墨點九螺

乞子履作  
靈芬館弟

圖九

春暮過荻莊仍疊頻伽所寄韻

芳塘幾日漲新波漸老鶯花恨若何  
芳徑低垂煙外柳松棚暗長雨中蘿  
殘春便覺游蹤少勝賞應誇我輩多  
詞社百年裙屐盛摩挲石蘚潤浮螺

丁香花下歌

香雲漠漠花冥冥花魂催我詩夢醒悄然無聲立花下露  
氣自向衣裳生六六屏風照花影十枝欹斜五枝整一縷  
微吹草際塵滿身若墮星光冷回頭簾幕鉦欲殘玉闌干  
外呼姍姍東風吹花落千片更欲飛上花枝難落花寸寸  
鋪如雪花事年年易消歇問花無語各淒然獨倚空庭佇  
明月

仙都篇

仙都二月春雲稠日華五色虹梁浮東風吹綠波如油游  
鱗躍水齊上鈎雲間霧閣涵清流萬枝花紅水上樓竿旗  
百尺曳綵旒香塵夾道鳴華騶仙才翩翩屈宋儔較輶班  
馬超枚鄒如集萬國之共球爭以所好來相投銅龍夜半

催曉籌九門洞開邃殿幽紫皇勅召羣真遊玉女傳言請  
少休鐵網不下珊瑚愁龐眉仙翁位列侯叩以掌故百不  
優龍威秘牒無人摻百年琳史誰復修銀濤無聲雪練收  
斲蘭爲樅松爲舟一葦可渡不自由瑤臺明月澄寒湫長  
相思兮春復秋

論詩三首

太乙仙人白玉爲高樓雲霞輝五色萬怪騰龍蚪下臨  
蓬萊水乃作清淺流桂樹枝婆娑尚待月斧修豈有神異  
境而許塵埃留昨逢瑤水仙偕作釣臺遊贈我金光草一  
笑回清眸雲腮澹容與寶訣倘可求

長生固云樂求仙亦不易辛苦營丹砂匪以歲月計松芝

采千春瑤英結萬穗綺靡雖不珍容飾極都麗手持綠玉  
章上叩司香吏靈之來如雲名字了不記笑語列仙班未  
座或可廁所願誠素通勿詫面目異

寶帳垂流蘇中有百和香八琅鏗然鳴上奉王母觴宮徵  
一移換誰與窮微茫侑以黃金卮酬以碧玉璫居然主壇  
席顧盼生輝光怡蕩且莫制行樂夜未央織女亦何爲不  
能成報章寥天河漢濶獨立長傍徨

### 捕蝗行

淮陰不雨數十日一雨始活田中禾村農額手有喜色忽  
又駭報飛蝗過紛如滿山亂墜籜疾若織布無停梭草間  
蠢動作蟠螭野外蠻觸驅蜚蛾大者爲蟻小者蝶蟻谿蟻



斯方言訛此皆蠱類損苗稼願界炎火全消磨官符刻日  
督胥吏村畦四面圍網羅勤者受賞惰者罰戟手相奮肩  
相摩踐踏秧田若土芥道旁醉尉煩馳訶吾聞漢時廣陵  
郡羣蝗飛入大海波螟蠚蠹賊復何有能變災戾爲祥和  
卽今久旱熾蟲毒小雨不得成滂沱大江以南患靈潦百  
穀爛死愁若何願蝗化作魚與蛤濟此四野哀鴻多

建康都統司輓歌爲陳茂才

秋濤

作兼示璵兒

癸未夏六月白下陳茂才自沐陽至淮畱宿學舍相與摻  
訪石壘因得此輓於頽牆破壁中陳君云曩嘗見建康古  
輓於金陵之長干里其制度與此相類焉按唐以前武職  
有都督將軍而無都統都統之名雖見於唐之乾元大中

間爲討徐州及黃巢而設然不常置卽北宋時出師征討  
拔一人爲都統以總之亦無定員惟職官志載建炎初置  
御營都統司是都統之名實自南宋始也又志載紹興十  
二年於興元江陵建康鎮江池州平江皆除都統制元史  
百官則改都統爲都督總管萬戶等名金史雖有都統然  
與建康無涉故建康之都統惟南宋有之又考晉書地理  
志愍帝改建業爲建康宋地理志南唐改建康爲昇州北  
宋升爲建康軍南宋建炎三年改爲建康府卽其地爲行  
官置主管司留守是建康之有府有司亦自南宋始也嘉  
定錢官詹師金石跋尾載建康府輒據景定建康志亦定  
爲南宋時物云有瞿生者得之於鄉試號舍中諒此輒於

白下尙有留遺而淮之有城亦築於南宋其時往就建康  
取甄後之修學宮者斷瓦零甃互相移置耳其旁有提舉  
二字想係武職官銜惜缺損不可辨又有運水軍字及楚  
字已酉字諸甄不知何時所鑄俟續考

荒齋亂石積尋丈土花四壁薶烟蕪終朝運甃學陶侃自  
笑却類愚公愚白下陳生淮海客相逢信宿供清娛穿籬  
剡蘚踏犖确仄徑捫葛行縈紆欲披枯藤走螻蝥恐有石  
墨藏黽黽忽聞拍手笑且呼招我諦視牆之隅建康都統  
司五字字字清晰無模糊云是南宋之舊物苔紋滴翠生  
膏腴曾見金陵古僧舍與此尺寸還相符袖攜拓本皮行  
篋細讀跋尾言非誣當年泥馬渡江後大興工匠營行都

一人之陶供萬室瓦解事事愁剝膚宜和花石萎叢棘留  
此敗醜胡爲乎嗟哉陳生癖且迂性情嗜好與俗殊豈無  
黃金躍平地揮鋤視之皆砭砭獨搽殘字博攷證抉剔到  
處無遺珠不隨俗目混真贋一任路鬼紛擲揄江干分手  
日欲晡瞻望勿及空踟躕我家癡兒亦嗜古攝衣偃僂循  
牆趨掀泥移甕審其背提舉二字堪臨摹更得二甕亦奇  
絕畧似宋製形稍麤一甕題曰運水軍一甕楚字畱形模  
紀年恍惚已酉字剝落四角環蟻喻寄詩陳生足欣賞可  
能報我瓊瑤無相期與子古歡暢誰云吾道名山孤

黃茂才

景濂

邴示見懷之作用皮陸唱和韻未卽

報也暑牕雨過卽事偶成疊用孟東野憶蕭子真

韻四首卻寄

故人惠瑤華遲報匝一月受降既不甘索逋豈容歇松陵  
古風流詞壇霸吳越余亦搜枯腸屢視明鏡髮

微雲渡明河小雨洗新月寂坐秋心生夜吟暑氣歇試彈  
綠綺琴一絃一清越神山倘可游與君共晞髮

揮手金閨亭己卯仲冬月天空鷗夢孤客散酒杯歇白雲  
自南飛鄉關不可越迢迢江上山隔斷青一髮

箸書老窮愁羈宦促歲月晨星感零落大雅此消歇

謂彭甘亭

張補庵張椒卿諸君皆逝新知非素心覲面亦秦越何不掉頭去東海

一散髮

前有一尊酒行

山桃花開紅欲然鷓鴣杯泛春雲鮮絳樹金枝百二十四  
圍的樂明星懸斗帳紅珠燦連理佳人錦瑟嬌羅綺石葉  
薰來羅薦香銀屏引出歌聲起歌聲宛轉動清商歡樂今  
宵未遽央當筵一笑儘許買不惜千金博進償良夜迢迢  
月當戶落花如雪隨風舞綺筵客散酒杯空庭院陰沈夜  
深雨

長相思

複帳垂流蘇鑪香溫四角當牕整雲髻采綠不盈握六銖  
衣薄生秋風粧縈半銷鐙穗紅瓊樓高寒渺延佇一水隔  
斷雲千重斷腸之草不可食其花美好名芙蓉芙蓉花濯  
秋水思遠人月千里翡翠爲牀玉爲几迸落紅珠拾不起

山人飲酒

我從山人遊山人飲我酒停杯問山人山中何所有松篁  
自成林麋鹿與爲友龐眉老人瞳子綠日日高歌拍銅斗  
殷勤問名姓談笑殊從容或呼綺里季或號東園公酌酒  
勸座客痛飲三百鍾簷際新鶯百轉工門前流水春溶溶  
不知歸路在何處滿山惟見桃花紅

野田黃雀行

黃雀兮黃雀啄粟於野田一朝生羽翼乃欲飛上天將飛  
兮未翔瞥遇鷹與鷂鷹鷂性好殺逐雀太逼促羣鳩伺其  
旁欲啄黃雀粟庸知弋者捕雀往鳩亦因之入羅網黃雀  
可哀羣鳩可憐鷹鷂本同類何不防患於未然雀旣覆其

巢鳩亦鍛其羽徒令弋者恣所欲嗟爾鷹鷂亦何苦鸚鵡  
雖能言不與弋者語

雉子斑

我歌雉子斑曲終客長嘆枯桑生風月滿山出門四顧天  
荒寒雉子斑我羨爾文采惜爾羽翰前有摯獸後有彈丸  
爾飛已倦爾宜早還胡爲雄飛雌從終日旋繞於林間雉  
子斑往復還哀鳴啄粟非得已可憐毛羽徒摧殘

白紵舞歌辭

春江花落春水香春風飄蕩雙鴛鴦風吹樓下花枝舞樓  
中織錦誰家女文窗窈窕繡幕垂蘭膏明燭生光輝中夜  
流黃不停織夢魂空憶關山月妾身願爲機上梭宛轉隨



絲往來捷

君馬黃

君馬黃我馬驢君馬飽我馬飢君馬行速我馬行遲君馬  
見我馬回首生悲嘶兩馬各相顧兩心不相知憶我初識  
君並轡長安道涼風八月蝴蝶黃一望平蕪滿青草君控  
青絲轡我乘下澤車相逢大隄上佇立空踟躕青山一角  
暮雲紫策馬勞君問名氏

登高邱而望遠海

登高邱望遠海七尺珊瑚枝枝紅可采秦時五大夫顏  
色青不改蒼髯綠髮顧我笑問我別來幾千載金莖玉盤  
露氣濃青山陡覺醅顏紅君不見秦碑漢時沒荒草至今

猶說蓬萊宮青霓叩額紫鸞叱馭雁落猿驚麟超龍翥璇  
臺金闕碧岩峩拂衣便欲乘風去耳邊礮響流淙淙無那  
雲深不知處

行路難

君不見晴日游絲滿芳甸夾道飛花撲人面一雨十日愁  
滂沱平地倏忽成江河老農輟耕三嘆息村婦攜鋤水中  
立南方不可以久居到處河魚腹生疾庸知遷客動悲歌  
厭聽枯魚過河泣涉波之豕僵且死踰淮之橘化爲枳炎  
涼氣候有如此乞食吹簫竟誰是飛蝗滿天或集于屋飢  
鴻四野不得一粟天風蕭蕭海水寒白日欲落雲漫漫行  
路難摧心肝

古別離

生來歡樂地不識別離苦問君何爲遠行役馬邑龍堆歷  
險阻昔君醉臥長安市裘馬翩翩少年子歸來新製合歡  
襦不信羅敷自有夫波平如鏡紋如縠杏子衫紅酒痕綠  
錦瑟初彈明月春篴忽操涼州曲吁嗟乎昔爲神仙今  
謫戍目斷輪臺夕陽暮綠珠一去不復回鄉樹青青夢中  
路吾聞古邊塞寥落無人家今之新墮拓萬里漸與內地  
同繁華馬上纖腰舞貼地知君此行亦快意

于闐采花

于闐采花人綽約顏如玉能彈趙女箏解唱明妃曲塞上  
花飛愁殺人東風三月可憐春風花歷亂千萬片化作紅

雨沾衣塵碧草如煙淚如雨獨抱琵琶不能語

妾薄命

妾本良家子灼若桃李妍言乘油壁車願侍君王前後宮  
列粉黛錯落珠翠鈿容華豈相如妾命祇自憐羅袂生涼  
颼團扇合棄捐棄捐不忍絕恩愛原無偏謂妾解音律妙  
得宮商先佳麗三千人弦索手自傳一弦一惆悵惆悵思  
華年君不見邯鄲才人嫁與廝養卒覽鏡猶憐舊顏色

黃茂才

景濂

寄詩述水災事次韻邵寄四首

入夏久不雨一雨數日陰秋聲忽而至攪此羈人心雨後  
透微月天半看橫參良朋辱來訊兀坐攄清吟覩縷述瓊  
事蕭緘愁霖霖急潦成洪河疾風無靜林廡花霧氣墮階

蘇泥痕侵君家舊茅屋竹樹徑不深胡爲水中沍客至煩  
招尋

飛蝗集淮郡時維孟秋月百里襍蠹擾四埜震兀聳老農  
籲呼天蹙額怪咄咄哀禱何其愚定數那能越窮搜及草  
根亂撲走且蹙長官促捕蝗星夜令倉猝吏胥如飢鷹攫  
食伺竈突螟螣幸漸弭狼莠尙猖厥天災所流行民命繫  
存沒窮儒一方研妄冀八口活生涯逐蟬蠹噍噍口不歇  
客從吳會來訛言我疑之或云河魚腹濕疾不可醫或云  
瘍癘作膚理生紅絲勢若草滋蔓斤斧不可斯更傳數澤  
間百怪恣所爲浮漚散珠貝恐是鯨人遺作其鱗之而蛻  
蛻雲下垂此係江海物平陸豈所宜掀翻昏旦異咫尺風

雨隨傳語賊衆聽色變爲移時

入秋以來訛傳江浙沿海處屢出蛟

平生身世憂百願無一遂禿筆抽思枯冷羶抱影媿渺焉  
蟣蝨身竊此雞蟲利經營百不諳水旱且洊至事業成空  
談江山動愁思誰獻時務策豫爲廟堂備自分老溝壑何  
能議政事我

皇勤萬幾先自察吏始燮理稍有垂股肱任誰寄腐儒無  
深謀迂論且勿置迢迢夜漸長耿耿坐不寐勗君驂玉虬  
一展青雲驥

中秋夜有懷黃茂才

鑑

中秋夜無月陰沈作風雨眷念同志者咫尺會合阻差幸  
馳詩筒來往不數武各道故鄉事相與傾肺腑音隨哀鴻

哀語雜苦蟲苦夏霖久不歇秋漲勢莫禦遠邨無炊煙近  
峴少乾土鄉農日數千擅擊縣庭鼓口稱飢欲死速造賑  
荒簿官言且少緩我當額大府中有不逞徒弁髦視其主  
謂以餓而生不若死之愈搏膺而狂呼洶洶肆詈侮雖欲  
繩以法莫敢犯其怒亦有馴良民飢餓不出戶旦暮轉溝  
壑慘戚那忍睹傳聞或未確我已亂心緒冷宦困於此君  
亦在羈旅一年所儲蓄不足謀二鬴一身尚如此世事更  
何補作詩話無聊倡和予與汝飛夢江鄉雲迷濛不知處  
似見城之隅積水尺四五躡起宿雨收東方日初吐

十月十九日訪頻伽于袁浦別後有作

倦遊歸渡袁江水飛夢不到袁江雲咫尺淮陰倏四載魚

鳥亦笑詩囊貧此間有客絕閒散獨以述作輝千春翩然  
命駕辱過我我亦鼓興來尋君路轉青帘水邊市樹絢紅  
葉霜前邨相逢各道故鄉事江關蕭瑟同悲辛積水數竿  
喜漸退高田二麥畧可耘更述近狀問無恙落落數語意  
則真天寒日短促歸路惜未暢讀詩篇新臨行酌我一卮  
酒薄醉不及傾千尊比歸夕陽照林薄飛鳥欲下猶逡巡  
卻笑此遊太匆促轉令別後馳心神平生自負腰脚健勝  
情如此亦可嗔一葦杭之尚爾爾何況千里勞蹄輪雲龍  
會合本無定湖海共此閒中身明春堤柳放新綠潭水深  
處尋汪倫

頻伽客汪已山員外家時主人出門不值擬明春再訪

和作

郭 麐



浮生出處不自主無異變滅空山雲依人作活強自  
解然而豈日能安貧今年我歸訪學舍花事零落畱  
餘春蓬窗落筆寄苦調窈眇髣髴絃湘君分湖之曲  
本舊宅昔賢作圖名水村偶因移巢避戊己畧有雜  
著志癸辛分甘鄉里結保社便令兒子充耔耘京師  
名姓久不到谷口安用傳子真豈知下田水爲患種  
麥不及明年新楊然無用一大瓠依舊浮作江湖尊  
昨朝淮壖衆賓集主人置酒過數巡明鐙合樂張水  
嬉凌波羅襪來雒神頽然一翁坐兀冪詎敢自憊恐  
人嗤記八月中訪君時事感君復來一相顧如鳥有翼車有輪  
餞歲欲歸尚未得不知何日由此身孝章林宗各老

矣讓與年少誇人倫

汪已山員外敬過訪學舍別後賦此以寄

淮陰一水達袁浦我昨尋君適相左今晨紅樹客停車足  
音三徑來于于我聞君名十年矣我識君顏目今始前生  
似逐雲龍翔不記何年隔煙水新知初締如舊盟泠然氣  
與清風清片語乍將懷抱吐四座已覺煙霞生蓬蒿三尺  
苔痕沒老圃殘香未銷歇儘有清歌上綠雲可無濁酒邀  
明月君言解蓀歲欲闌更無暇日供清歡與子痛飲醉十  
日須俟春漲添三竿送君出門與君別沿隄衰柳還堪折  
遙望林臯十里亭荻蘆兩岸花如雪蘧齋詩人頗倦遊卒  
歲或可仍勾留東南賓主合衆美此樂真足輕王侯嗟余

懶散百事廢所恨談藪無朋儔君之意氣乃如此羨君直  
是神仙流神仙翹首渺無極從君願借鷗風翼

和作

清河汪敬

淮陰一壩公路浦地雖偏隅不僻左南北恒來君子  
車傾蓋往往如友于聞君之名已久矣相思不自今  
日始云何相避若燕鴻卅里盈盈隔秋水昨朝竟遂  
鷗鷺盟使我一洗雙眸清長身局踣住學舍握手髣  
髴同平生愧我無聞本沒沒豪氣猶然未銷歇秋中  
讌集恨無君共吸流霞醉明月傾談未盡日欲闌與  
君預訂隔歲歡茅堂雖小足下榻盆池縱淺容垂竿  
臘尾年頭兩月別別後依依思東折等身箸述輕鼎

鐘落紙煙雲雜冰雪老來只合秉燭遊五日十日期

淹留雜體擬古江文通

謂聽香

兒童知名郭細侯

謂頻伽

更有朱家論雄快亦儒亦俠無匹儔

謂鐵門

眼中數子

一相見溫嶠肯在第二流長歌答君意無極望君莫

作差池翼

同人集飲一枝巢次黃茂才

鐵韻

素衣不慣汗緇塵空山猿鶴直吾隣淮壩信美非吾土滯  
此鍛翮三年頻諸生雜選執贄拜一歲晝夜傭書勤三百  
青蚨杖頭貯十脰冷脯盤中陳寒鷗乍聯淡交淡野蔬可  
當珍饈珍年荒村釀味甚薄餉客何處開芳醇殘陽在樹  
紅欲墮滿天霞綠濃如醺簷花已殘且延佇螺卮欲舉還

逡巡圍坐輒誇酒兵健分曹恥作降將軍吾鄉叔度千頃  
量既醉仍似初筵賓百篇詩題酒樓上十年悔不遊天津  
昔之標格自矜許近復刻削歸清真欲瀉長江濯冰魄珊  
瑚百丈垂竿綸我雖興會異疇昔尚有風月能平分此時  
此地有此會此會轉眼如浮雲醉鄉古今數知己王無功  
與劉伯倫富貴於我豈足羨任所遭遇情爲欣平生結習  
也自笑文字鎮日談諄諄唇乾口燥飢欲死循牆面壁倦  
且踈聊分脉望飽殘馥不揖槃敦從諸君詩盟偶許附皮  
陸詞苑便欲追蘇辛老矣中書髻毛禿誰復汗簡銘其勲  
願向青山借邱壑種松萬畝成龍鱗菜圃家餘糧半斛橘  
官歲取錢千緡林禽亂啼萬花谷糟邱一卧三千春勸農

詩擬陶靖節閒居賦就潘安仁千尊呼客醉明月明月照  
見波清淪亮哉風尚頗自喜何時了此前生因客筵一散  
夜寒峭明河天半懸星辰干林落木風聲急我亦高歌動  
鬼神

落葉四首次程與九韻

石逕荒寒少客蹤打聽林籜墜重重遠山斂碧清于洗小  
閣流雲澹不封解脫已醒塵世夢飄蕭頓減舊時容半牀  
殘藁慵收拾卧聽聲聲咽冷蛩

幾點昏鴉影有無驚傳秋信到庭梧似催郊島詩心苦畧  
做迂癡粉本麤踏遍芒屨成獨往掃殘苔髮又平鋪愁風  
愁水年年慣攜酒登樓望遠燕

迢迢關塞憫塵勞，峽口飛泉徹夜號。  
暫爾樓遲憐瘦損，最先零落爲孤高。  
清砧和雨聲初急，別酒臨風興轉豪。  
回首綠陰渾似夢，不須露井訪仙桃。

貝多經卷禮和南荷，錫埋詩聚作龕老。  
去年華真易擲病，餘禪味漸能諳。  
商量別院移修竹，檢點長鑱種石枅。  
家住白雲樵路近，一林瘦影月平涵。

冬至夜雪霽

九九消寒第一圖，亞欄干外月模糊。  
簷低暑透雲深淺，徑仄全迷路有無。  
幾點疎花香守鶴，誰家紅燭醉呼盧。  
袁安只合耽高臥，那識天涯節候殊。

蘊懷閣詩續集卷第二